

სასწავლო უნივერსიტეტის “ბაუ ინტერნეიშენალ უნივერსითი, ბათუმი“
აკადემიური საბჭოს არჩევნების დებულება

მუხლი 1. არჩევნების გამოცხადება

1. „ბაუ ინტერნეიშენალ უნივერსითი, ბათუმის“ (შემდგომში უნივერსიტეტი) აკადემიური საბჭოს წევრის არჩევნებს ნიშნავს აკადემიური საბჭოს თავმჯდომარე - უნივერსიტეტის რექტორი.
2. რექტორის ინდივიდუალურ-სამართლებრივი აქტი არჩევნების გამოცხადების თაობაზე უნდა იყოს ყველასათვის ხელმისაწვდომი და საჯარო გაცნობის მიზნით უნდა გამოიკრას თვალსაჩინო ადგილას.
3. აკადემიური საბჭოს წევრის არჩევის ვადა განისაზღვრება 2 წლით.
4. აკადემიური საბჭოს წევრთა რაოდენობა განისაზღვრება 5 წევრით.
5. აკადემიური საბჭოს წევრებად შეიძლება არჩეულ იქნენ მხოლოდ სრული ან ასოცირებული პროფესორები.
6. აკადემიური საბჭოს წევრად პირი შეიძლება არჩეულ იქნეს ზედიზედ მხოლოდ ორჯერ.

მუხლი 2. საარჩევნო კომისია და მისი უფლებამოსილება

1. აკადემიური საბჭოს არჩევნების ჩატარების მიზნით იქმნება უნივერსიტეტის საარჩევნო კომისია.
2. საარჩევნო კომისიის წევრთა რაოდენობა უნდა იყოს კენტი. საარჩევნო კომისიის წევრთა რაოდენობა და შემადგენლობა განისაზღვრება რექტორის ინდივიდუალური სამართლებრივი აქტით.
3. საარჩევნო კომისია უფლებამოსილია, მიიღოს ყველა გადაწყვეტილება არჩევნების საორგანიზაციო საკითხებთან დაკავშირებით.
4. საარჩევნო კომისიის თავმჯდომარე აირჩევა კომისიის პირველ სხდომაზე მისი შემადგენლობიდან კომისიის წევრთა ხმათა უბრალო უმრავლესობით, ფარული კენჭისყრით. საარჩევნო კომისიის თავმჯდომარე ხელმძღვანელობს კომისიის სხდომებს, ხელს აწერს კომისიის მიერ მიღებულ გადაწყვეტილებებს.
5. საარჩევნო კომისიის მდივანად აირჩევა კომისიის ნებისმიერი წევრი კომისიის პირველივე სხდომაზე, ფარული კენჭისყრით, დამსწრეთა უბრალო უმრავლესობით. კომისიის მდივანი ადგენს კომისიის დღის წესრიგს და სხდომის ოქმებს, რეგისტრაციაში ატარებს საარჩევნო კომისიაში შეტანილ კორესპოდენციას, რეგისტრაციაში ატარებს არჩევნებში მონაწილეობის მსურველ კანდიდატებს და აძლევს მათ შესაბამის მოწმობებს, ადგენს არჩევნების შემაჯამებელ ოქმებს და ახორციელებს მისთვის მინიჭებულ სხვა უფლებამოსილებებს.

6. საარჩევნო კომისია გადაწყვეტილებას იღებს დამსწრე წევრთა უმრავლესობით. საარჩევნო კომისიას გადაწყვეტილების მიღება შეუძლია, თუ მას ესწრება კომისიის წევრთა ნახევარზე მეტი.

მუხლი 3. არჩევნების ჩატარება

1. აკადემიური საბჭოს არჩევნებში ხმის მიცემის უფლება აქვს უნივერსიტეტის ფაკულტეტის/ფაკულტეტების აკადემიური პერსონალის ყველა წევრსა და ფაკულტეტის საბჭოს წევრ სტუდენტთა თვითმმართველობის წარმომადგენლებს.
2. აკადემიურ საბჭოში არჩეულად ითვლებიან საუკეთესო შედეგის მქონე კანდიდატები.

მუხლი 4. არჩევნების ორგანიზება და ჩატარების წესი

1. აკადემიური საბჭოს არჩევნებში ხმის მიცემის უფლების მქონე პირთა საარჩევნო სიას ამტკიცებს უნივერსიტეტის საარჩევნო კომისია შესაბამისი ფაკულტეტის წარდგინების საფუძველზე.
2. აკადემიური საბჭოს არჩევნებში მონაწილეობის უფლების მქონე კანდიდატებს არეგისტრირებს უნივერსიტეტის საარჩევნო კომისია შესაბამისი ფაკულტეტის წარდგინების საფუძველზე. აკადემიური საბჭოს არჩევნებში ხმის მიცემის უფლების მქონე პირთა საბოლოო სია, ასევე არჩევნებში მონაწილეობის უფლების მქონე პირთა/კანდიდატთა საბოლოო სიები უნდა დამტკიცდეს არჩევნების თარიღამდე სულ მცირე 7 დღით ადრე.
3. საარჩევნო ბიულეტენის ფორმას ამტკიცებს საარჩევნო კომისია.
4. ამომრჩევლის მიერ ხმის მიცემა ხორციელდება საარჩევნო ბიულეტენზე სათანადო აღნიშვნით და საარჩევნო ბიულეტენის საარჩევნო ყუთში მოთავსებით.
5. საარჩევნო ბიულეტენზე აღინიშნება:
 - შესაბამისი ფაკულტეტის სახელწოდება
 - ასარჩევი კანდიდატების ჩამონათვალი.
6. საარჩევნო ბიულეტენი გაცივმა პირზე, მხოლოდ შესაბამისი პირადობის დამადასტურებელი დოკუმენტის წარდგენის შემთხვევაში.
7. კენჭისყრის დღეს ფაკულტეტის ამომრჩეველი საარჩევნო კომისიის რეგისტრატორისგან იღებს შესაბამის საარჩევნო ბიულეტენს, რასაც ადასტურებს ამომრჩეველთა სიაში მისი გვარის გასწვრივ ხელმოწერით. ამის შემდეგ ამომრჩეველი მიდის ხელმომწერ კომისიის წევრთან, რომელიც საარჩევნო ბიულეტენის შესაბამის გრაფაში აწერს ხელს. შემდეგ ამომრჩეველი შედის სპეციალურად მოწყობილ საარჩევნო კაბინაში, მას შემდეგ, რაც წრიულად შემოხაზავს მისთვის სასურველ 1 კანდიდატურას, აგდებს საარჩევნო ბიულეტენს საარჩევნო ყუთში.
8. კენჭისყრა იწყება არჩევნების დღის 10 საათზე და მთავრდება იმავე დღის 18 საათზე.
9. კენჭისყრის დასრულების შემდეგ საარჩევნო კომისიის წევრები ითვლიან საარჩევნო სიებში ხელმოწერების მიხედვით არჩევნებზე გამოცხადებულ ამომრჩეველთა რაოდენობას ცალკე, რაც ფიქსირდება შესაბამის შემაჯამებელ ოქმში, რომელშიც აისახება არჩევნებში მონაწილე ყველა კანდიდატის მიერ მიღებული ხმების რაოდენობა.

10. არჩევნები ჩატარებულად ჩაითვლება თუ მასში მონაწილეობა მიიღო ხმის უფლების მქონე პირთა ნახევარზე მეტმა.
11. არჩევნებზე გამოცხადებულ ამომრჩეველთა რაოდენობის დათვლის შემდეგ იხსნება საარჩევნო ყუთი და კომისიის წევრები ითვლიან საარჩევნო ბიულეტენებს.
12. საარჩევნო ბიულეტენი ბათილია, თუ:
 - ა) არ აღმოჩნდა საარჩევნო ბიულეტენზე ხელმოწერი კომისიის წევრის ხელმოწერა;
 - ბ) თუ არ არის შემოხაზული არც ერთი კანდიდატურა;
 - გ) თუ შემოხაზულია ერთზე მეტი კანდიდატურა;
 - დ) თუ შეუძლებელია გაირკვეს, რომელ კანდიდატს მისცა ხმა ამომრჩეველმა.
13. ხმების დათვლისთანავე ივსება შემაჯამებელი ოქმი, რომელშიც შეიტანება შემდეგი მონაცემები :
 - ა) ფაკულტეტის ამომრჩეველთა რაოდენობა სიების მიხედვით;
 - ბ) არჩევნებზე გამოცხადებულ ამომრჩეველთა რაოდენობა საარჩევნო სიებში ამომრჩეველთა ხელმოწერების მიხედვით;
 - გ) საარჩევნო ყუთში აღმოჩენილი საარჩევნო ბიულეტენების საერთო რაოდენობა;
 - დ) თითოეული კანდიდატის მიერ მოპოვებული ხმების რაოდენობა;
 - ე) კომისიის ყველა წევრის ხელმოწერა.

მუხლი 5. არჩევნების შედეგების გამოცხადება

არჩევნების შედეგები ცხადდება არჩევნების დღეს. საარჩევნო კომისია ვალდებულია ყველასათვის ხელმისაწვდომ ადგილას გამოაკრას არჩევნების შედეგების აქტი.

მუხლი 6. არჩევნების შედეგების გასაჩივრება

1. არჩევნების შედეგების გამოცხადებიდან 24 საათის განმავლობაში კანდიდატს უფლება აქვს შეიტანოს საჩივარი საარჩევნო კომისიაში. ამ ვადის გასვლის შემდეგ საჩივარი არ მიიღება.
2. საარჩევნო კომისია ვალდებულია საჩივრის შეტანიდან 3 დღის განმავლობაში განიხილოს საჩივრები და მიიღოს სათანადო გადაწყვეტილება.

მუხლი 7. საბოლოო შედეგების გამოქვეყნება

1. საარჩევნო კომისია არჩევნების შედეგებს ამტკიცებს შემაჯამებელი აქტით.
2. არჩევნების საბოლოო შედეგები ძალაში შედის გამოქვეყნებისთანავე.